

Ծոյ շներ, լոյսն այնպէս կու լինի. դուք մոլորեցաք և հետ ճհտին գատիկ արիք. և հոռոմնին ի յամօթացն չեն գրուցեր: Եւ երբ տեսան որ այսպէս հրաշք եղաւ, նայ Երուսաղեմայ դատին ինքն իւր ձեռօքն տասն թուխթ կու գրէ, և զիւր մօհրն ի վերայ կու կոխէ, և զպարօնին և զէմինին, կու տայ պարօնին քօֆխային, թէ առ և տար Հայոց ազգին բաժանէ. և քօֆխայեան զթխթերուն զորն ի Հայրապ կու տայ, զորն ի Ամիթ, զորն ի Ղայսարի և զորն ի Թոխաթ և ի Սեաստ, և զմէկ թուխթն յԼստամբօլ բերին. և զայս բաներս ամէնն ի մէջն գրած էր. և յետոյ գրած էր, թէ Հայոց ազգն հանց ազգ է՝ որ զԺԱ (11) ազգն կոխեց և սեւերես արաւ: Եւ յԵրուսաղեմայ մինչև յԼստամբօլ զինչ քաղաք որ կայ՝ զամէնն զհոռոմնին տուգներ են, թէ դուք զձեր հաւատն մոլորեցաք. և Հայոց ազգ խիտ ուրախացեր են, և տավուով և զուռնայով կերեխում են արեր. և ամէն ազգ հոռոմին յետևանցն կու կանչեն, թէ զգատիկն մոլորեցաք և ճուհուտ եղաք. նոքա այլ ի յամօթնացն և սեւերեսութենէն մարդու երես չեն նայեր և ճուսոյ չեն ի տար:

Եւ երբ մեզի այս բարի խապարս որ եկաւ և զթուխթն կարգացին, ՀԲ (72) միլլաթ լսեց, և Հայոց ազգն խիտ ուրախացան, և հոռոմնին սեւերես եղան և զլխիկոր. և արարիչն Աստուած զՏէր Աստուածատուր վարդապետին առաջն շատ այնէ, որ ժողովեց զԼստամբօլու զքահանայքն և զտանուտէրքն, և ասաց. թէ, Այս տարի հայար տարու զլուխ է. զինչ որ ձեր նամուսն է՝ նա զայն արէք: Եւ առաք զԵրուսաղեմայ եկած քօֆխայեան իւր մարդոցմովն, և տավուով և զուռնայով, նազարով և պօռուով, ի Սուլու մանաստիւրն ի պատիւ բերաք իւր մարդոցմովն, և երեք օր հարկեցաք: Եւ վարդապետն մէկ աղէկ կապայ մի փէշքաշ երետ, և Լստամբօլու տօլվաթօրքն մէկ արծաթի սուրահի մի տվին և արծաթի մոշոպայ՝ մի և արծաթի թաս մի, և արծաթի գաւաթ մի. և թող զայլ Ֆլորիքն որ տվին, և ի տավուլէն և ի զուռնայէն, ի նազարայէն և ի պօռուէն հանց եղաւ, որ Լստամբօլ քաղաք ի դունդ (թունդ) ելաւ: Եւ տոճկաց ազգն կ'ասէին թէ այս ի՞նչ ուրախութիւն է. նայ կ'ասէին թէ Հայոց ազգին յԵրուսաղեմայ խապար եկեր է՝ որ լոյսն Հայուն ելեր է, և հոռոմն լոյս չէ ելեր. և հոռոմ ազգն ի սեւերես լինալուն մէկ շարաթ ի դուրս չելան: Եւ այսօր յետև գնաց քօֆխայեան ինքն իւր բանն. և մէկ շարթու յետև հոռոմի դարձած տաճիկ եկաւ, որ զԵրուսաղեմայ բերդին դուռն կու պահէ եղեր է, նայ այլ այսպէս գրուցեց. և հոռոմնեւուն յերեսն կու թքնուր. և կ'ասէր, թէ զհաւատքն ձեր մոլորեցաք: Եւ յետոյ յայլ կանանչ զլուխ եկաւ, և ճուհուտ եկաւ, և արապ եկաւ, և ենկիւ շարի եկաւ, և Հոռոմ եկաւ. և նոքա այսպէս վկայութիւն տվին, և Հայոց ազգս առաւել ուրախացան: Եւ յետոյ յուլիսի ԻԲ, Երուսաղեմայ Քրիստոսի գերեզմանին յարութեան լուսարարն եկաւ, որ զլոյսն ինքն իւր ձեռաւքն է